

Plans d'instrucziun vinavant chaussa d'experts

■ **(anr/fa) L'iniziativa «Buna scola grischuna – cundecisiun tar plans d'instrucziun» ha gì il sustegn da diesch deputadas e deputads. In s'ha abstegnì da la vusch, ils auters 102 recumandan da refusar l'iniziativa.** La primavaira 2017 aveva inoltrà il comité d'iniziativa duas iniziativaas cun il titel «Buna scola grischuna». Quellas han la finamira da dar al parlament e pli tard er a las votantas ed als votants la pussaivladad da cundecider areguard dumondas da furmaziun ed areguard ils plans d'instrucziun. Sco proponì da la regenza ha era la maiortad da la cumissiun per furmaziun e cultura dal cussegl grond decis da proponer al suveran da refusar sco l'emprima era la segunda iniziativa cun il titel «Buna scola grischuna – cundecisiun tar plans d'instrucziun». Il Plan d'instrucziun 21 (PI 21) na vegnia betg menziunà en il text da l'iniziativa, ha ditg la presidenta da la cumissiun predeliberanta, *Cornelia Märchy-Caduff* (pcd, Razén), «era sch'ìls iniziants paran d'esser cunter il PI 21». Quest plan d'instrucziun è dapi diesch dis en vigur, el vegn pass per pass introducì en las scolas grischunas. L'iniziativa vegniss suttamessa al suveran

grischun il pli baud durant il mais november, «damai cur che scolastas e scolasts èn plainamain londervi ad introducir il PI 21.» Ch'i dovria uss en emprima lingia temp per quest'introducziun, ha ella punctuà, «cun refusar l'iniziativa survegnan ins quest temp.» La maiortad dal parlament era da ses avis. Cun 102:10

vuschs ed ina abstenziun ha decis il cussegl grond da recumandar a las votantas ed als votants da refusar l'iniziativa «Buna scola grischuna – cundecisiun tar plans d'instrucziun». Uschia resta vinavant la regenza responsabla per ils plans d'instrucziun. E per far quai ha ella il sustegn dad expertas ed experts en chaussa.



Il cussegl grond è suandà la recumandaziun dal minister d'educziun Martin Jäger.